

# ጳጳርሲ ፃፊዳ ኮይር ኪታ ጋሳ ቆፋ

ሃዋርያ ጳጳርሲ ፃፊዳ ኮይር ኪታይ ፃፊትዳይ፡ «ደሬትዳ ፆሳ አሳታ» ጌቲቲ ጌጌቲዳይሳታሲኔ ጉላ ኢሲያን ፑይሃ ባጋን ላሌቲዳ አማኒያ አሳሳ፡ ሃ ኪታ አይፊ ቆፋይ፡ አማኖ ጋሶን ሜቶይኔ ዋይይ ጋኪዳ አሳ ሚንጹላናሳ፡ ሃ ማፃፋ ፃፊይ፡ ኢያ ሃይቆዋ፡ ኢያ ዴንዲዋ፡ ኢያ ናምዓንሎ ዩሳ ኦዲያ ዩሱስ ኪሪስቶሳ ዋንጌላ ቃላ ኤንታ ሃሳይሴስ፡ ዩሱስ ኪሪስቶሳ ዴዑዋ ለሚሶ ኦሊ ጌሊዲ፡ ሜቲዋ ዳንዳዓን ካንላናዳ ኤንታ ቆፊሴስ፡ ሄሳራ ጋሊዲ፡ ሜቶይ ኤንታ አማኑዋ ጌሻቴላ ፓጩይሳኔ፡ «ዩሱስ ኪሪስቶሲ ቆንጩያ ጋላስ» ቤሲያ ዋይቶ ኤንቲ ኤካናው ዴዔይሳ ሃሳይሴስ፡

ፃፊይ፡ ኤንቲ ሜቶ ዳንዳዓና ሜላ ሚንጹላይሳ ቦላ ኪሪስቶሳ ካሊያ አሳቲ ዴዔይሳዳ ዳና ሜላ ቆፊሴስ፡

## 1 ጳጳርሳ ኪታ አይፊ ቆፋታ

- ሳርሶ 1:1-2
- ፆሳይ ኑስ ኢሚዳ አቶቴላ 1:3-12
- ጌሻቴላ ዲሱ 1:13-2:10
- ሜቶ ዋዴ አማኒያ አሳይ ሃናናው ቤሲያባ 2:11-4:19
- ጩማታሲኔ ናዓቴላታስ ኢሜቲዳ ዞሬ 5:1-11
- ኩሻ ቆፋ 5:12-14

1 ታኒ፡ ዩሱስ ኪሪስቶሳ ሃዋሪይ ጳጳርሲ፤ ጳንፆሳን፡ ጋላቲያን፡ ቃጳዶቂያን፡ ኢሲያኒኔ ቢቲኒያን ቤታንቾዳ ላሌቲዲ ዴዔያ ፆሳይ ደሪዳ፡ አሳስ ሃ ዳብዳቢያ ፃፋሰ፡ 2 ዩሱስ ኪሪስቶሳሰ ሂንቲ ኪቲታና ሜላኔ ኢያ ሱላን ጌያና ሜላ፡ ፆሳ አዋይ ባ ካሴ ኤራን ደሪዳይሳታሲኔ ጌሻ አያናን ጌዱዳ፡ ሂንቲው አጽ ኬሃቴላይኔ ሳርቴላይ ጊደ፡

### ጳዮና ኡፋይሳ

3 ዩሱስ ኪሪስቶሳ ሃይቆፔ ዴንሊዲ ባ ጊታ ማርቴላን ናምዓንሎ ዩሌቴላኔ ጳዮና ኡፋይሳ ኢሚዳ ኑ ጎዳ ዩሱስ ኪሪስቶሳ አዋይ፡ ፆሳይ ጋላቴቶ፡ 4 ቃሲ ፆሳይ ሂንቲው ጳዮና፡ ኢቶናኔ ቡቆና ላታ ሳሎን ገጊሲሰ፡ 5 ሂ ላታይ ዋዴ ዉርሴላን ቆንጩናው ዴዔያ አቶቴላስ ፆሳ ዋልቃን አማኖን ሂንቲው ናጌቲዲ ዴዔሰ፡

6 ሃሲ ጉላ ዋዴሰ ሂንቴ ዲማ ዲማ ፓጩን ኢንዴቲካ ሄሳን ኡፋይቲቴ። 7 ሄ ፓጩይ ሂንቴና ጋኪዲይ፣ ታማን ዩጊን ጳያ ዋርቃፌ ሂንቴ አማኖይ አጵኔ ቱማ ጊዴይሳ ቤሳናሳ። ሄ ፓጩቲዳ አማኑዋን ዩሱሰ ኪሪሰቶሲ ቆንጩያ ዋዴ ጋላታ፣ ቦንቾኔ ሳባ ሂንቴ ኤካና። 8 ሂንቴ ዩሱሳ ቤዒቤኬታ፣ ሺን ኢያ ሲቋታ። ሂንቴ ሃሲ ኢያ ቤዒቦናባ ጊዲኮካ፣ ኢያ አማኔታ። ቃሲ ኦዲን ቆንጩሳናው ዳንዲዔቶና ኡፋይሳኒኔ ቦንቾን ኩሚዴታ። 9 ሂንቴ አማኖን ናጊያ ሂንቴ ሺምፑዋ አቶቴላ ኤካና።

10 አጵ ኬሃቴላ ባጋራ ሂንቴው ገጊዳ ሃ አቶቴላባ ናቤቲ ኤራናው ገታ ኮሻኒኔ ናጎን ኮዪደሶና። 11 ኤንታን ዴዒያ ኪሪሰቶሳ አያናይ ኢያ ዋያባኔ ሄሳፌ ጉዬ ያና ቦንቾዋባ ካሲቲዲ ማርካቲሺ፣ አዉዴ ዋይኮ ዋኒዲ ሃናኮ አኬካን ፒልጊደሶና። 12 ናቤቲ ኦዲዳ ቲንቢቲይ ባንታው ጊደናሺን ሂንቴው ጊዴይሳ ያሳይ ሂንቴው ቆንጩሲሰ። ሃሲ አሳይ ሂንቴው ኦዲዳ ዋንጌላ ሳሎፔ ኪቲቲዳ ጌሻ አያና ዋልቃን ሂንቴው ኦዲደሶና። ኪታንቾቲካ ሄሳ ቤዓናው አሞቲደሶና።

**ጌሻቴላን ዴዒቲ**

13 ሄሳ ጊሾ፣ ኦሶሰ ሂንቴና ገገሲቴ፤ ሂንቴና ሃሪቴ። ዩሱሰ ኪሪሰቶሲ ቆንጩያ ዋዴ ሂንቴ ኤካና አጵ ኬሃቴላ ኡፋይሳን ናጊቴ። 14 ያሳ ናይታዳ ኢያው ኪቲቲቴ፤ ሂንቴ ካሴ ኤርና ኦሉዳ ኢታ አሙዋ ካሎፊቴ። 15 ሺን ሂንቴና ጃጊዳ ያሳይ ጌሺ ጊዲዳይሳዳ ሂንቴካ ሂንቴ ዲሳ ኡባን ጌሺ ጊዲቲ። 16 ጌሻ ማፃፋን፣ «ታኒ ጌሺ ጊዲዳ ጊሾ ሂንቴካ ጌሺ ጊዲቲ» ጌቲቲ ያፌቲሰ።

17 አሳ ሶምዖ ቤዖና ኢያ ኦሱዋዳ ፒርዲያ ያሳ፣ «ኮ አዋው» ጊዲ ጃጊያባ ጊዲኮ፣ ሃ ሳዓ አማላቴላ ዲሳ ያሻን ዴዒቲ። 18 ሂንቴ፣ ሂንቴ አዋታፔ ላቲዳ ፓሶና ዴዐዋፔ ዋዜቲዳይሲ፣ ጳያ ቢራን ዋይኮ ዋርቃን ጊደናይሳ ኤሬታ። 19 ቦሬይ ዋይኮ ቦርሶይ ባይና ደርሳ ሱላዳ አልዖ ጊዲዳ ኪሪሰቶሳ ሱላን ዋዜቲዴታ። 20 ያሳይ አላሜይ ማዴታናፔ ካሴ ኪሪሰቶሳ ደሪሰ፣ ሺን ሃ ዉርሴላ ዋዲያን ኪሪሰቶሲ ሂንቴ ጊሾ ቆንጩሲ። 21 ሂንቴ አማኖይኔ ሂንቴ ኡፋይሳይ ያሳን ጊደና ሜላ ኢያ ሃይቆፔ ዴንሉዲ፣ ቦንቾዳ ኪሪሰቶሳ ባጋራ ያሳን አማኔታ።

---

1:16 ለዌ 11:44-45፤ 19:2

22 ሂንቴ ቱማቴላስ ኪቴቴዲ ሂንቴናቴላ ጌሺዳታ። ሂንቴ ኢሶይ ኢሱዋ ዋዛናፔ ሲቁታ፣ ሺን ሃዒካ ቱማ ዋዛናፔ ሚንሊዲ ሲቁቴ።

23 ሂንቴ ናምዓንሉ ዩሌቴዲይ ቆያ ዜሬላፌ ጊደናሺን ማሪናው ደዒያ ያሳ ቃላን ቆዮና ዜሬላፌ ዩሌቴዳታ። 24 ያሳ ቃላይ፡ «ኣሲ ኡባይ ማታ ማላ፤

ኢያ ቦንቾ ኡባይ ጨሻ ማላ። ማታይ ማሌስ፣ ጨሻይካ ቆሌቴስ።

25 ሺን ጎዳ ቃላይ ማሪናው ደዒስ» ያጌስ። ሂንቴው ኦዴቴዳ ዋንጌላ ቃላይ ሃይሳ።

## 2

### ዴዎ ሹቹኔ ጌሻ ዴሬ

1 ሂዛ፣ ኢታቴሊ ኡባ፣ ጨዋ ኡባ፣ ጨቦቴሊ ቃናቴኔ ዘገርሲ ኡባ ሂንቴፌ ዲጊቴ። 2-3 ጎዳይ ኬሃ ጊዴይሳ ሂንቴ ኤሪዲ ማዜቴዳይሳዳ ሃዒ ዩሌቴዳ ጉላ ናይታዳ ሂንቴ ኣቶቴላን ዲጨሺ ባናው ያሳ ጌሻ ቃላ ማላ ኡባ ዋዴ ኣሞቴቴ።

4 ኣሳን ቦሬቴዲ ያሳን ዶሬቴዳ ኣልዎ ጊዲዳ ዴዎ ሹቻ፣ ጎዳ ዩሱሳኮ ሺቁቴ። 5 ሂንቴ ኣያና ኬሊ ኬፀቴያ ዴዎ ሹቻታ። ሂንቴ ዩሱስ ኪሪስቶስ ባጋሪ ያሳ ኡፋይሲያ ኣያና ያርሾ ያርሺያ ጌሻ ካሂኔታ። 6 ጌሻ ማፃፋን፡

«ሄኮ፣ ታኒ ጂዮኔ ካታማን ጎዳ ፃጶዋ ሚንሊያ፡

ዶሬቴዳ፣ ኣልዎ ሹቻ ዋላስ፤

ኢያን ኣማኒያ ኦኒካ ዩላቴና»

ያጌስ። 7 ሃ ሹቻይ ሂንቴው ኣማኔይሳታስ ኣልዎ፣ ሺን ኣማኖናይሳታስ፡

«ገምቤይሳቲ ካዲዲ ኢዲዳ ሹቻይ

ጎዳ ፃጶዋ ሚንሊያ፡

ኡባፌ ኣዲያ ሹቹ ጊዲስ።»

8 ቃሲካ፡

«ሃ ሹቻይ ኣሴ ቆቢያ ሹቹኔ ኣሴ ኩንዲሲያ ዛላ»

ያጌስ። ኤንቴ ሂሳስ ቃዴቴዳ ጊሾ ያሳ ቃላ ኪቴቶና ኢዲዲ ቆቤቴደሶና።

---

1:24 ኢሳ 40:6-8    2:2-3 ማዝ 34:8    2:6 ኢሳ 28:16    2:7 ማዝ 118:22    2:8 ኢሳ 8:14-15

9 ሺን ያሳይ ቆማፔ ማላሊሲያ ባ ፖዑዋኮ ሂንቴና ጃጊዳይ፡ ሂንቴ ኢያ ሎዎቴላ ሃራታስ ኑዳናው ደሬቲዳ ዛሬ፡ ካዎ ካሂኔ፡ ጌሻ ዳሬኔ ያሳ ዲማ ዳሬ። 10 ሂንቴ ካሴ ያሳ ዳሬ ጊዳኬታ፡ ሺን ሃዒ ሂንቴ ኢያ ዳሬ። ሂንቴ ካሴ ማርቴላ ዳሚቤኬታ፡ ሺን ሃዒ ማርቴላ ዳሚዳታ።

**ያሳ አይሌዳ ዴዎ**

11 ታ ኢሻቶ፡ ሂንቴ ሃ ሳዓን ኢማሌኔ ቤታንቾ ጊዲዳይሳዳ ሂንቴ ሼምፑዎ ኦሊያ አሾ አሞፔ ሃካና ማላ ታኒ ሂንቴና ዋሳይስ። 12 አማናና አሳይ ሂንቴና ኢታ ኦሊያ አሳዳ ዘገርያ ዎዴ ያሳይ ኑና ቤዓናው ያ ጋላስ፡ ኤንቲ ሂንቴ ሎዎ ኦሱዋ ቤዒዲ ያሳ ጋላታና ማላ ሂንቴው ሎዎ ዴዎይ ዴዎ።

13 ጎዳ ጊሾ ጊዲ ማታራ ዴዒያ አሳታስ ሃሬቲቲ፤ ኡባፌ ቦላ ጊዲያ ጊሾ ካወዋሰካ ሃሬቲቲ። 14 ኤንቲ ኢታ ኦሊይሳታ ሴራናዉኔ ሎዎ ኦሊይሳታ ሳባናው ካወዋፔ ኪቲቲዳ ጊሾ ዳሪያ አይሴይሳታስ ሃሬቲቲ። 15 ሂንቴ፡ ሂንቴ ሎዎ ኦሱዋን ኤርና ኤያ አሳ ድና ኦይላናይሴ ያሳ ሸኔ። 16 ያሳ አይሌ ጊዲዲ ላዓቴላን ዳዒቲፔ ኦቲን ሂንቴ ላዓቴላ ኢታ ኦሶስ ካማ ኦሶፊቲ። 17 አሳ ኡባ ቦንቺቲ፤ አማኒያ አሳ ሰቂቲ፤ ያሳ ያዩቲ፤ ካዎ ቦንቺቲ።

**ኪሪሰቶሳ ዋያ ለሚሱዋ**

18 አይሌቶ፡ ሎዎ ጎዳታሴኔ ኬሃ ጎዳታ ፃላላስ ጊደናሺን ኢታታሰካ ቦንቾን ሃሬቲቲ። 19 አሴ ያሳ ጊሾ ጊዲ ቤሶና ዋዬ ዋዬቲኮ ያሳይ ኢያ አንጅና። 20 ሺን ሂንቴ ናጋራ ኦሊን ሂንቴና ዳቺያ ዎዴ ሂንቴ ዳንዳዒኮ ሂንቴው አይ ጋላቲ ዳዒ? ሺን ሎዎባ ኦሊዲ ዋዬ ዳንዳዒኮ ያሳይ ሂንቴና ሃሳስ አንጅና። 21 ያሳይ ሂንቴና ጃጊዳይ ሃሳ ጊሾሳ፤ ኪሪሰቶሴ ሂንቴው ዋዬቲስ፤ ሂንቴ ኢያ ካላና ማላ፡ ሂንቴው ለሚሶ ጊዲስ። 22 ኢ ናጋራ ኦሊቤና፤ ኢያ ድናንካ ዎርደይ ቤንቲቤና። 23 ኤንቲ ኢያ ጫያ ዎዴ ዛሪዲ ጫዩቤና። ሺን ዋዬ ኤኪሼ ጂሎ ፐርዲያ ያሳስ ባ ፐርዳ አጋገሰፔ ኦቲን ማንዲቤና። 24 ኦኒ ናጋራስ ሃይቂዲ ጂሎቴላስ ዳና ማላ ኪሪሰቶሴ ባ አሹዋን ኑ ናጋራ ማሰቃሊያ ቦላ ቶኪስ፤ ሂንቴ ኢያ ማዳንላን ፓዲዳታ። 25 ካሴ ሂንቴ ኦኔ ባሊዲ ቆዩዳ ድርሳ

---

2:9 ኬሳ 19:5-6፤ ኢሳ 43:20-21፤ ዛሬ 4:20፤ 7:6፤ 14:2፤ ቲቶ 2:14፤ ኢሳ 9:2    2:10 ሆሴ 2:23    2:22 ኢሳ 53:9    2:23 ኢሳ 53:7    2:24 ኢሳ 53:5

ሜላ፡ ሺን ሃዲ ሂንቲ ሸምጥዎ ሄሜይሳኮኔ ናጌይሳኮ ሲሚዳታ።

### 3

#### አዚናባኔ ማቸባ

1-2 ሃሳዳካ፡ ማቸቶ፡ ሂንቲ አዚናታፔ ያሳ ቃላስ ከቲቶናይሳቲ ደዲኮካ አይኮካ ኦዴቶናሺን፡ ሂንቲ ያሻቴላኔ ሂንቲ ጌሻ ደዑዎ ቤዲዲ አማናና ሜላ ኤንታው ሃሬቲቲ። 3 ሂንቲ፡ ሂንቲ ሁዔ ፒያኒኔ ዋርቃ አሶን ዋይኮ ሎዎ ማዎን ሂንቲ ቦላ አሳቴላ ሎይሶን ጌደፖ። 4 ሺን ሂንቲ ዋዘና ጌደን ደዲያ ዩጌልሳቴላይ ያሳ ሲንላን ሂንቲው ዳሮ አልዎ ጌዲዲ ቆዮና፡ አሸኬኔ ዋፑ ጌዳ አያና ጌደ። 5 ያሳይ አማና ጌዳይሳ አማኒዳ ጌሻ ማጫሳቲ ቢኒ ዋዴ ባንታ አዚናታስ ሃሬቲዲ፡ ባንታና ሃሳዳ ዳሮ ሎይሌደሶና። 6 ሃሳዳ ሳራ አብራሃሜ፡ «ታ ጎዳው» ያጋዳ ያጋሼ፡ ኢያው ከቲታሱ፤ ሂንቲካ አይኮካ ያዮና ሎዎባ ኦሌኮ ኢ ናይታ።

7 አዚናቶ፡ ሂንቲ ማቸቲ ሂንቲፌ ዳቡራንቸ ሜዴታ ጌዳይሳ ኤራዲ፡ ኤንታና ቦንቸቲ፤ ሂንቲ ዋሳ ቆቦና ሜላ ያሳይ አሚዳ ደዑዎ ኤንቲ ሂንቲራ ኢሲፌ ላቲያ ጌሾ ኤንታ ቦንቸቲ።

#### ሎዎ ኦሌዲ ሜቶ ኤኮ

8 ወርሴላን፡ ኡባይ ኢሲ ቆፋን ደዲቲ። ኢሶይ ኢሱዋስ ቃዴቲሼ፡ አሻዳ ሲቄቲቲ፤ ቃሲ ኢሶይ ኢሱዋስ ኬሃታኔ አሸኬታ ጌዲቲ። 9 ኢታ ጌሾስ ኢታ ዋይኮ ጫሻ ጌሾ ጫዱዲ ዛርፒቲ፤ ሃሳ አጌዲ፡ ያሳይ ሂንቲው አንጂዋ አማናው ሂንቲና ያጌዳ ጌሾ አንጂቲ። 10 አይስ ጊኮ፡ ጌሻ ማፃፋይ፡ «ደዎ ደሴይኔ ሎዎ ዋዴ ቤዓናው ኮዬይ ኦና ጌዲኮካ ባ ኢንፃርሳን ኢታባኔ ዋርዶ ኦዴቲይሳ አጎ።

11 ኢታባ ኦሌይሳ አጌዲ ሎዎባ ኦላ፤

ሳርቴላካ ኬሂ ኮዮኔ ካሎ።

12 ጎዳ አይፌይ ዲሎታኮ ያሌሰ፤ ቃሲ ኢ ኡባ ዋዴ ኤንታ ዋሳ ሃይዜሰ።

ሺን ጎዳይ ኢታባ ኦሌይሳታ ባ ሃንቆ ሶምዑዋን ያሌሰ» ያጌሰ።

---

2:25 እሳ 53:6    3:1-2 ኤፌ 5:22፤ ቆላ 3:18    3:3 1፻ዎ 2:9    3:6 ሜዴ 18:12    3:7 ኤፌ 5:25፤ ቆላ 3:19    3:10 ማዝ 34:12-16

13 ሂንቴ ሎዎባ ኦፋናው አሞቲኮ ሂንቴና ቆሃናይ ኦኔ? 14 ሃሪ አቶሺን፣ ጂሎቴላ ጊሾ ሂንቴ ዋዬቲኮ ኣንጃቲዳይሳታ። ኣሳሰ ያዮፊቴኔ ሂርሳፊቴ። 15 ኪሪሰቶሳ ሂንቴ ዋዛናን ቦንቺቴኔ ጎዳዪቴ። ያሳይ ሂንቴው ኢሚዳ ኡፋይሳሰ ጋሶ ኦይቺያ ኦዳሰካ ዛር ኢማናው ኡባ ዋዳ ገጊ ኡቲቴ፣ ሺን ሄሳ ኣሽኬቴላኒኔ ያሻን ኦሊቴ። 16 ቃሲ ኪሪሰቶሳን ሂንቴ ዴዒያ ሎዎ ዴቡዋ ኢታባ ኦሊዳባዳ፣ ሂንቴና ጫያ ኣሳይ ዚገርያባን ዬላታና ሜላ ሂንቴ ካሃይ ጌሺ ጊደ። 17 ያሳይ ጊዳባ ጊዲኮ ኢታባ ኦሊዳ ጊሾ ዋዬ ኤኬይሳፊ ሎዎባ ኦሊዳ ጊሾ ዋዬ ኤኬይሲ ሎዎ። 18 ኪሪሰቶሲ ኑና ያሳኮ ሺሻናው ባው ጂሎ ጊዲዲ ዴዒሼ፣ ናጋራንቸታ ጊሾ ኢሲ ቶሆ ናጋራ ኡባሰ ሃይቁሰ፤ ኢ ባ ኣሳቴላን ሃይቁሰ፣ ሺን ኣያናን ፓዲሰ። 19 ቃሲ ሄ ኣያናን ኢ ቢዲ ቃሾን ዴዒያ ሹምፖታሰ ቃላ ኦዲሰ። 20 ኖሃይ ማርካቢያ ኬጂያ ዋዳ ሄ ሹምፖቲ ያሳሰ ኪቴቶና ኢጂዶሶና፣ ሺን ያሳይ ኤንታና ዳንዳዒሰ። ሆሰፑን ኣሳ ያላሊ ማርካቢያን ጌሊዲ፣ ጳዮ ሃላፊ ኣቲዶሶና። 21 ሄ ጳዮ ሃላይ ሃዒ ሂንቴና ኣሺያ ዲንቃቴ ለሚሶ ጊዲሰ። ሃ ዲንቃቴይ ቦላ ቁታ ሜጮ ጊደናሺን ሎዎ ካሃ ያሳፊ ኤካናው ኢያ ዋሲያ ኦጌ ጊዲዲ፣ ኪሪሰቶሳ ዴንዳዋ ባጋራ ሂንቴና ኣሼሰ። 22 ኢ ሳሎ ቢዲ ያሳ ኡሻቻን ኡቲዲ፣ ኪታንቸታ፣ ማታ ኣዋታኔ ዋልቃማታ ሃሪሰ።

# 4

## ያሳሰ ዴዎ

1 ሄሳ ጊሾ፣ ኪሪሰቶሲ ባ ኣሹዋን ኑሰ ዋዬቲዳ ጊሾ ሂንቴካ ሄ ቆፋን ሂንቴና ዳንጨሲዲ ሚኒዲ ኤቁቴ። ኪሪሰቶሳ ጊሾ ጊዲ ባ ኣሹዋን ዋዬ ኤኬዳ ኡራይ ናጋራ ኦሊኬ ጊዲ ቃንጂዳ ኣሲ። 2 ሄ ኡራይ ባ ኣቲዳ ሳይላን ያሳ ሼኔ ኦፋናው ኮዬሲፔ ኣቲን ኢታ ኣሾ ኣሞን ዴና። 3 ካሴ ሂንቴ ኣማኖና ኣሳይ ዴዒዳይሳዳ ዴዒዴታ። ሂንቴ ኢታ ኣሞን፣ ላይማቴላን፣ ማሉን፣ ቱናቴሊ ዴንጫሊያ ዬላን፣ ፖኪያ ኤቃ ጎይናን ካሴ ዴዒዳ ዴሳይ ጊደና። 4 ኣማኖና ኣሳራ ሂንቴ ሾሪ ባይና ኦሱዋ ኦሶና ጊሾ ማላሊቲዲ ሂንቴና ጫዮሶና። 5 ሺን ኤንቲ ፓፃታ ቦላኔ ሃይቁዳ ኣሳ ቦላ ፐርዳናው ዴዒያ ያሳሰ ዛር ኢማና። 6 ሃይቁዳ ኣሳሰ ዋንጌላይ ሳባኬቲዳይ ሃይሳ

---

3:14 ማቶ 5:10፤ ኢሳ 8:12-13      3:20 ሜዴ 6:1-7:24

ጊሾሳ። እንቲ አሳሉ ባንታ አሹዋን ፐርዳታና ቃሲ ባንታ አያናን ያሳሉ ዴዎን ዳና።

7 ሂዛ፡ ኡባባሰ ዉርሴላይ ማታቲሰ። ሄሳ ጊሾ፡ ዋሳናው ዳንዳዔታና ማላ ዋፑ ጊዳ ዋዛኒ ዴዎ፤ ማራራ ዴዒቲ። 8 ሲቆይ ዳር ናጋራ ካሚያ ጊሾ ኡባፌ አሲዲ ኢሶይ ኢሱዋራ ዋዛናፔ ሲቆቲቲ። 9 ዙዙዋና ኢሶይ ኢሱዋ አማላቲሳን ሞከቲ። 10 ሂንቲ ያሳፌ ዲማ ዲማ አጾ ኬሃቲሳ አሞታ ኤኪዳይሳዳ ሂንቲ ኢሶይ ኢሶይ ሄ ኢሙዋ ቤሲያዳ ኦይኪዲ ኢሶይ ኢሱዋ ሃጋዚቲ። 11 ዬሱስ ከሪሰቶሳ ባጋራ ኡባባን ያሳይ ጋላቲታና ማላ ኦኒካ ኦዲያባ ጊዲኮ ያሳፌ ቃላ ኤኪዳዳ ኦድ። ቃሲ ኦኒካ ማዲያባ ጊዲኮ ያሳይ ኢያው አሚያ ዋልቃዳ ማድ። ቦንቶይኔ ዋልቃይ ማሪናፔ ማሪና ጋካናው ኢያው ጊድ። አሚንዒ።

**አማኖ ጋሶን ጋኪያ ዋያ**

12 ታ ባጋቶ፡ ሂንቲ ታማዳ ፀጊያ ዋዬ ፓጪያ ጊድራ አጲያ ዋዴ ኦራላባይ ሃኒዳዳ ማላሌቶፊቲ። 13 ሺን ኢያ ቦንቶይ ቆንጪያ ዋዴ ሂንቲ ኡፋይሳይ ጊታ ጊዳና ማላ ከሪሰቶሳ ዋያ ሂንቲ ኤኬይሳን ኡፋይቲቲ። 14 ከሪሰቶሳ ሱንላ ጊሾ አሲ ሂንቲና ጫያ ዋዴ ያሳ ቦንቶ አያናይ ሂንቲ ቦላ ሸምፐያ ጊሾ ሂንቲ አንጃቲዳይሳታ። 15 ሂንቲፌ ዋዬ ኤኪያ ኦኒካ ሸምፐ ዋጲዳዳ ዋይኮ ካይሶቲዳዳ ዋይኮ ኢታ ኦሲዳዳ ዋይኮ ጌልሶናባን ጌሊዳዳ ሃኒዲ ዋዬቶፎ። 16 ጊድሺን፡ አማኖ ጊሾ ዋዬቲኮ ከሪሰቶሳ ሱንላ ጊሾ ያሳ ጋላቶፔ አቲን ዬላቶፖ።

17 ፐርዲ ያሳ አሳ ቦላ ደሚያ ዋዴይ ጋኪሰ። ሂዛ፡ ሄ ፐርዳይ ኮይር ኦ ቦላ ደሚያባ ጊዲኮ፡ ያሳ ዋንጌላሰ ከቲቶና አሳ ዉርሴላይ አይ ጊዳኔ? 18 ዲሎይ ኡንሳን አቲያባ ጊዲኮ፡ ማካላንቶይኔ ናጋራንቶይ ያቲን ዋናኔ? 19 ሄሳ ጊሾ፡ ያሳ ሺኔዳ ዋዬ ኤኬይሳቲ ባንታ ሸምፑዋ ሃዳራ ባንታና ማጲዳ፡ አማንሴያ ያሳሰ አሚሼ ሎዋባ ኦሎ።

**5**

**ጨማታሲኔ ያላጋታሰ አሜቲዳ ዞሪ**

1 ሂዛ፡ ዋሳ ኬሳ ጨማታራ ጨማ ጊዲዳይሲ፡ ከሪሰቶሳ ዋያ ማርካቲይሲኔ ቆንጫናው ዴዒያ ቦንቶዋ ሻኬታናው ዴዒያ ታኒ፡ ሂንቲ ጊድን ዴዒያ ጨማታ ዞራይሰ። 2 ሂንቲ አዋቲሳፌ ጋርሳን ዴዒያ ያሳ ዉዲያ ሄሚቲ። ያሳይ ኮዬይሳዳ ደሳናፔ አቲን

ኡንዴቲዲ ሃዋፊቲ። ቃሲ ሚሼ ኮሻን ገደናሺን ሃጋዛናው ደዲያ ሎዎ ቆፋን ሄሚቲ። 3 ሂንቴ አዋቴላፌ ጋርሳን ደዲያ ወዲያሰ ሌሚሶ ገዲቴፔ አቲን ጎዳቶፒቲ። 4 ሄሚይሳታ ሃላቃይ ቆንጨያ ዋዳ ቆሌቶና ቦንቾ ካላቻ ሂንቴ ኤካና።

5 ሄሳዳካ፥ ያላጋቶ፥ ጨማታሰ ሃሬቲቲ። ሂንቴ ኢሶይ ኢሱዋሰ አሽኬ ገዲቴ። ጌሻ ማፃፋን፥ «ዎሳይ ኦቶራንቾታ ኢዳሰ፥ ሺን አሽኬታሰ አጼ ኬሃቴላ ኢሜሰ» ያጌሰ። 6 ዎሳይ ባ ዋዳ ሂንቴና ቦንቻና ሜላ ዋልቃማ ዎሳ ኩሺያፔ ጋርሳን ሂንቴና ካወሺቲ።

7 ኢ ሂንቴው ቆፒያ ገሾ ሂንቴና ሂርጊሲያ ኡባ ኢያ ቦላ ዩጊቲ።

8 ሂንቴ ሞርኬይ ያላሄይ፥ ሚቲያባ ኮዩዲ፥ ጋሞዳ ጉዲሼ ሂንቴ ማታራ ዩያ ገሾ ሂንቴና ሃሪቴኔ ባርኪቲ። 9 አላሜን ደዲያ ሂንቴ አሻቲ ሄሳዳ ዋዬ ኤኬይሳ ኤሪዲ፥ አማኖን ሚኒዲ፥ ያላሂያራ ኤቁቲቲ። 10 ባ ሜሪና ቦንቾዋሰ ኪሪሰቶሰ ዩሱሳ ባጋራ ሂንቴና ያጊዳ አጼ ኬሃቴላ ኡባ ዎሳይ፥ ጉላ ዋዳሰ ሂንቴ ዋዬቲዳፔ ጉዬ፥ ኢ ባ ሁዔን ሂንቴና ሺሻና፥ ካቲሳና፥ ሚንሊዲ ኤሳና፥ ያሊሳና። 11 ሜሪናፔ ሜሪና ጋካናው ዎሳይ ካዎቶ፥ አሚንዲ።

**ወርሴላ ሳርሳ**

12 አማኔቲዳ አሻ ጋዳ ታ ኤኪያ ሲላሴ ባጋራ ሃ ዳብዳቢያ ሂንቴው ቃንሳን ያፋሰ። ታ ሄሳ ሂንቴው ያፊዳይ፥ ሂንቴና ዘራናወኔ ዎሳ አጼ ኬሃቴላይ ቱማ ገዳይሳ ማርካታናሳ። ሄ አጼ ኬሃቴላን ሚኒዲ ኤቁቲ።

13 ሂንቴራ ኢሲፌ ደሪቲዳ ባቢሎኔን \* ደዲያ ዎሳ ከላ አሳይኔ ታ ናዓ ማርቆሲ ሂንቴና፥ «ሳር ሳር» ያጌሰ። 14 ሲቆ ዩሬቴላ ዩሬቲሼ፥ ኢሶይ ኢሱዋ ሳርሊቲ።

ኪሪሰቶሳን ደዲያ ሂንቴ ኡባሰ ሳርይ ገደ። አሚንዲ።

---

5:2 ዮሃ 21:15-17    5:5 ለሚ 3:34    5:6 ማቶ 23:12፤ ሉቃ 14:11፤ 18:14    5:12 ሃ.ኦ 15:22፣ 40 \*    5:13 ባቢሎኔን፣ ሃ ቤሳን ባቢሎኔ ጌቲቲዳይ ሮሜ ካታማ ገደና አገና።    5:13 ሃ.ኦ 12:12፣ 25፤ 13:13፤ 15:37-39፤ ቆላ 4:10፤ ፊልሞ 24



**ኦራሳ ጩቂዋ ኅፋሶ**  
**New Testament in Gofa**

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 21 Feb 2024 from source  
files dated 29 Jan 2022  
c35d6c73-3843-5482-b53e-7559d35deee5